

電○十月朔乙亥○丙子雷電西方有氣如火光○以尹樟為弼善金相玉為持平○備局以咸鏡前監司李善溥接伴使朴權之言啓請北道親騎衛限一千二百名精抄充定四等試才居首者出身即除邊將間良直赴殿試公私賤免身從之○丁丑 上以冬雷下教責勵仍求言其略曰嗚呼雷電視前益慘轟轟之聲燁燁之光雖盛夏亦所罕有蹶然而起心骨俱驚達曙靡定也嗚呼八路告歉民方殿屎公私赤立濟活無策對王食而無味當丙枕而不安非常之災又如疊臻究厥所以亶由否德反躬省愆罔敢遑寧也朝廷之上無寅協之風節屋之下有愁歎之聲賦役煩重積弊因循加以綱紀頽弛百隸怠官文恬武嬉玩愒成習君臣上下若不劃然改圖思所更張則天怒日深終必棄予而不復警告矣豈不大可懼哉承旨代予草教宜自政府廣求直言以匡小子之不逮言雖不中予則優容若其乘時傾陷之言本不欲觀也嗚呼近來黨習日痼良由為人上者不能盡建極之道而然也予甚慚恧而在下之人亦必秉心至公不以一毫私意叅錯於其間則庶有和靖之望頃年臺疏言甚不是而終塞試官之望為祖鳴冤過激何傷而一遞憲職更不舉擬是豈和平之道耶不得不言之也咨爾大小臣僚體予警懼之意痛去玩愒之習精白一心盡